

ZOU PRESBYTERIAN CHURCH SYNOD
The Presbyterian Church of India



**UPA CHITNA Loh A
KITELDAN**

Published by:
Publication Board
Zou Presbyterian Church Synod

ASUNGATHU UMTE

1. Pulahna	
2. Deisahpina	
3. Hattuom Upa Chitnate	1
4. Upa Dinmun leh Anasep	6
5. Thuguh	11
6. Pastor Mawpuohna	15
7. Hattuom Buoina	18
8. Buoina chi ni	20
9. Vantang Thumanna	22
10. Upa Kityeldan	25
11. Vaiguon	28

PULAHNA

Tami Hattuum Upa chitna leh Upa teldan bu, MGP Session 2005 thupased No. 16na dungjui in, Synod Executive Committee in Synod huong sung a diing a pichingtah a siemkhiet diing in working Committee/ZPCS ah mawpuohna apie hi. Vide Resolution No.11, Date 21-07-2006

Tuachin, Working Committee in asiemkhe diing in Upa Suankhanmang, Sr. Secretary, ZPCS leh Upa Kamzadou, Finance Secretary, ZPCS mawpuohna a pekia hi. Vide Resolution No.8, Date 4th Aug. 2006. Abu a bawlkhiat diing a ahing siempen uh Working Committee in khuolchilna anei zou in Executive Committee ah etkaina, a um a, ngaidan kum nuomte a diing hun hon lemsahna anei a, tuami hun sung in ngaidan laikhawmna nei ahi.

Tuate toh etkahna akinei zou in, Working Committee in pomkipna nei in Zou Presbyterian Church Synod huong sung a Presbytery zousie in a jui ngei diing leh ajah ngei diing in abu a sutkhiet lemsahna alata hi. Vide Resolution No. 5 Date 9-11-2006.

Tambang a mawpuohna pich a um Upate'n buchingtah a, abu a sutthei a um diing a ahing suhbuchingpich jieuh un Zou Presbyterian Church Synod min in lungdam thu tut ahi.

Tam Hattuum Upa Chitna leh Upa kiteldan bu sim chiet a, Synod huong sung a Pasian nasepna a, aphatuom theipen diing in simtu zousie Pasian in vangbuoh taken, Amen.

Rev. Hangpi Manlun
Sr. Executive Secretary
Zou Presbyterian Church Synod

DEISAHPI NA

Synod in "Hattuom Upa Chitna leh Akiteeldan" Danbu khat bawlkhih dinga alemsahna bangin Upa Suankhanmang Secretary Sr. ZPCS leh Upa M.Kamzadou finance Secretary, ZPCS amaugel in ang gelkhih uh Publication/Literature Committee in etdihna anei a, sut a Publish bawl ding in pha akisa a, ang bawlkhie te tung ah Committee taang in lungdam thu ka tut hi. (Vide.R/No.1.dt. 4/12/2006).

Tualeh Danbu mengnou ahivang in a dihlou tampi na umkhate kingaisiem a isutkia chieng a hoijaw leh dihwaw a i sut ikilamet ua, a sim tapou te'n aphattuampi theina diing un Mangpa'n hing guoljawl taken.

Dated: Churachandpur
The 4th Dec.2006.

Upa Khupsuankham
Chairman,
Publication/Literature
Committee, ZPCS

HATTUOM UPA CHITNATE

I -Timothi 3:2-7

Pasian suoh (sila) a, Jesu Krist palai, Hagau Siengthou vanzah Hattuom lamkai a pang thei diing khat in ama hinkhuo a chitna anci diing kul-le-poimawte tam anuoi ate ahi:-

I. Timothi 3:2 ah:

1) Gensiet bei :- Gensiet bei china in khelna bei china ahisih a, tua hisihleh ami diing umlou diing hi. Upa leh Pastor-te khelna bei keei a um a, ahatmaw thei diing a lam-etna zong nei tuomlou diing ahi. Gensiet bei chi umzie ahileh mihing etna dan a et in bawllou diing a khaamte bawllou a, bawl diing a phut a umte leh lam-et te bawlzou jel mite genna ahi. Mi'n bawlkhielna anci a, chitlouna ancite apan a kisia a, kingainiemtah a bawlkhiel kahi achi a, achinlou ma kahi achi theileh koima'n a gengen thei nawnsih hi. Tuabang a kingainiemna hinkhuo nei mi ahidiing ahi.

2) Zi khat nei :- Meisie lou china ahi. Zi khat nei diing khu mihing ngaina ahia, zi khat nei hiloupen minautang a diing in zong deihuoiloupen ahiman in, lamkaitu Hattuom Upa leh puitu poimaw a chitna diing a gen a zong genlou ahoi hi. Tuajieh in Upa chitna diing in meisiete hitheilou ahi.

3) Kidehthei :- Silkhat pou pou ahun tan theisiem a, zuisiemna khu kidehtheina ahi. Mipilvang leh ahun tan theisiem a jui siem mite genna ahi. Kidehtheina neilou mi Pasian in a zang thei tahtah sih hi. Leitung a kitaidemna/ki-elna tuomtuomte ah zong chitna diing in kidehtheina a poimaw hi. Hattuom Upa chitna diing leh banglam pou chitna diing in kidehtheina a poimaw hi. Tuajieh in mipilvang ichite khu mi kidehtheite ahi uhi.

(4) **Hindan kilawm** :- Mihingte hinkhuo a hindan kilawm leh hindan kilawmlou a umthei hi. Hindan kilawm mi in lungsim leh ngaituona chiimtah anei a, tuabang mite in sil khat pou pou kizentah a semkhih leh genkhe theite hinkhuo ah kilawmna a um a; amun, ahun toh kituoh a gamtatdan, khoheidan, leh ham-le-pau pilvang leh umdan siem nite genna ahi. Lungsim leh ngaituona siengthoutah anei a, lungdamlouna paw gige lou mite ahidiing hi.

(5) **Mikitup** :- A lungsim leh ngaituona siengthou a, lungsim navah mi ahidiing ahi. A umdan, a khoheidan, gamtatdan, kampaudan, puonsil leh nihten tanpha ama toh kituoh a kilawm, ahun leh amun zil a bawlsiem mi ahidiing ahi. Mite musit leh mite simmaw diing a umlou mi, akicheidan, a umdan, bangkim a mite ettontah mi leh ngaisang huoi, ahi ban ah midangte hepina leh awlmawna nei gige mi ahidiing ahi.

(6) **Zin bawl siem** :- Khuolzin mite in a pawlnel a, Khuolzin mite tung a, ahoina leh achitna sulang thei mi ahiban ah kipahtah a khuolzin mite zintun-paikhai theina mi ahidiing ahi.

(7) **Mi thuhilthei** :- Thugen, Lasah, mite thuhilthei mi ahidiing ahi. Gingtute thuhilna ah bang, thuhiltu, zilsahtu ahidiing a, kithuhilna dihloute theisiemna toh daltu leh kaltu diing ahiman in mi thuhilthei, thuhilsiemmi ahidiing ahi. Thudih leh thudihlou khensiem a, thudih gum ngam mi ahidiing ahi. Heisung mun leh bang hun ah zong mite thuhil thei diing a mansa a umthei leh gensiem mi ahidiing ahi.

Taag thum ah :- Hattuom Upa hidiing a chitna 7 a gen zou ia, bawllou diingte ahing gen kia hi.

Zudawnlou mi :- Zu khamthei ahia, zudawnte'n zu akham jel uhi. Tuajieh in, zukham a umlou diing mite'n, zu adawnlou diing ahi. Lankaitu, khat pou pou in zu adawn a, zu akham leh ama leh ama

kisumuolphou asuoh hi. Tuajieh in hattuum a lamkaitu Upa hina diing a chitna khu zukham thanguoilou mi ahidiing ahi. Rome 13:13 a neh-le-dawn ah asieng leh asienglou a um ei? Chi dohna ah Paul in "Sil tengteng asieng a, hinanleh unau hatlouzawte adia puana apang lou diing in Paul in zu mai hilou in, Sa zong kane nawnsih diing achi hi". (1 Kor 8:8-13) Rome 14:14,15. Tuabang ahiman in Hattuum a lamkai Upa hina diing a bawllou diing in neh-le-dawn dan a kidehthei mi ahidiing ahi.

Minunnem :- Nunnem chi umjie dihtah khu, dihtat, thudihna, bawldihtu china ahi. Dan in aphut bangbang a sepkhiet chetchetna pen ahing dihlou hun a um maitheti; tuarna bang in Zou thupil a "thudih zousie hoi kimlou, thu hoi zousie dih kimlou," achima bang in, Dan a, akahieng khat ngaikhawhna hizawlou a, Dan pumpi ngaikhawh zawhna, ahoiloute thei ngitngat sang a, ahoizawpen thei ngitngatna ahi. Tualeh eima ngei in mi tung a silhoi i bawl khah umsunte thei ngitngat lou a, midangte'n eima tung a silhoi abawlte manghillou a thei gigena, thubuo'i um chieng a dan bang a suhveng utna hizawlou a, athu a itna toh kihoulem a suhveng utzaw gigte mi nunnem ahi uhi.

Lemthei mi :- Tenna pou, giehn pou, leh sepna munte a, Innsah-Innhang toh kilemtah a um leh khosa a hinkhuo mangthei mi khu lemthei mi ahi uhi. Tuabang a umtheilou a tenna, giehn leh sepna munte a midang toh kiselsel a kilem theilou mi a um tharn hi. Tuabang a umtepen Hattuum a lamkaitu Upa diing a chinlouna, tahlouna ahi. Sildang tengteng sang a mitoh kilemtah a um a, midangte khat-le-khat kal a kilemlouna umte a, lemna siemtu a, apan thei diing ahi. Tuachibang a hinkhuo mangtheite khu lemthei mi akichi hi.

Sum a du-aamlou mi :- Du-aam leh huoiham mi ahilou diing ahi. Sum deilou mihing a um theisih a, tuami sum deina apat akidehtheite khu du-aam leh huoiham aki chithei sih hi. Sum deina a kidehtheiloute bou du-aam leh huoiham mi akichi a, tuabang mite khu sumdeina mai hilou in siltengteng ah midangte a diing ngaituona neilou leh kidehna neitheilou mi ahi jel hi. Tuabang hinkhuo a umtepen Lamkai leh Hattuum Upa diing a chitna neilou mi ahi uhi. Tuama bang in Juda Iskriot zong Jesu nuajui 12-te lah a khat ahia, kidehtheina aneilou jie in sum a Du-aam leh huoihamna suol a puasie in shi dan huoisie in ashi zouta. (I Timothy 6:10) ah "*Dangka sum ngainatna khu gilou chinteng bul ahi*" achi hi. Tuabang ma in "*koima'n touni nna a semkhawm theisih*" Hattuum lamkaite ataangpi a, apuana ahileh sum-leh-pai, Numei leh Pasal kalthu ahi tangpi hi. Tambang ahiman in Hattuum Upa hidiing mi khu Sum a du-aam leh huoihamlou mi ahidiing ahi.

Ama Innsung siemhoithe mi :- Mi ama dinmun hina leh umdan in aphahna tantan a umjieneitah leh mumal neitah a Innsung a khosathei mi ahidiing ahi. Azi leh atate itna toh enkol zing a thununzou leh a zi-le-tate'n athu ajui leh athuman uh ahidiing ahi. Ama Innteen leh Innsung kithunun dan midangte ading a etton ching ahidiing ahi. Mi'n ama Innsung bawn enkol zoulou a, a zi-le-tate a thunun zousihleh, Hattuumte a enkol theisih diing hi. Sakholam a Innkuonte pui a, Innsung kikhopna leh biehma lam a siemtah leh pilvangtah a Innkuonte puitheilou mite in Hattuum Upa apang a, Hattuumte gasuo diing in apui theisih diing hi. Tuabang ahijieh in Hattuum Upa hidiing a chitna nei mi in ama Innsung siemhoi theimi ahidiing ahi.

GINGTHA MI AHILOU DINGAHI :- Tulai in hattuum khat apat hattuum khat a umtha, pemtha a tam a, tuajieh in gingtha chi leh

pemtha chi umjie theisiem akulta hi. Gingtha china in Pusa-Pasa bie a Khristian biehna a, ana umkhalou mite'n Khantanhoi pomna zieh a biehna ang tawpsan a, Khristian ahing suoh chieng in ama khu gingtha mi ahi. Tualeh, mi Khristian hisa daan zoukim a nahisa mi khat in Hattuum dang khat ah pemitna anei chieng in ama khu gingtha hilou in pemtha ahizaw hi. Tuabang mi Presbyterian daan toh kituoh Pawlpi a um a, Upa hisate zong Pawlpi vaihawmna in a lemsahna bang a Upa hina toh pomthei ahi.

Gingtha mi ahilou diing chi umdan ahileh gingtha mite in thakhat thu a kaisangna leh mipi tung a lamkai hina, mawpuohna dinmun a hing kaisangna in kiletsahna leh kiptah apanzoulouna atun nuom hi. Tuabang a, a um chieng in Dawimangpa siemloutanna thaangkuol ah alut kha jel hi. Dawimangpa zong kideikhopna, kiletsahna, tungnun utnate jieh asiemmaw tang ahi. Isai 14:12-14 tam Dawimangpa siemloutanna thanguol a lutpen hundamna amangta china ahisih a, Hattuum sung a buoina chi tuomtuom piengkhe a, Pasian pomtah a nasepna umlou china ahi. Hattuum lamkai leh Upa atel diing mi Nasepte 6:3 ah, "Hagausiengthou a kidim leh pilna nei a kitheimite" achi hi.

Pulam mite'n athulahtheimi ahidiing :- Mite'n mihoi a ngai a, mihoite mizousie in a pawlthei hi. Hattuum Upa khu hattuum mite mai in apahtat diing ahisih a, pulam mite tanpha in Upa khu asilhoi bawl jieh a pahtatna apiehthei mi ahidiing ahi. Pulam a mite mai a melsietna in Hattuumte tung ah melsietna atun hi. Hattuum leh pulam mite lah a silhoi bawl a lemna dei gige mi leh Krist khantanhoi toh kituoh a umdan, gamtatdan siem mi ahidiing ahi. Mihing hinkhuo leh Krist khantanhoi akituoh chieng in Hattuum leh mipite pahtat atang jel hi. Hattuum Upa in Hattuum leh pulammite gensiet thei

khop a, ahing um chieng in Dawimangpa siemmawtanna thanguol sung ah a um china ahi. Tua ahiman in Hattuum Upate khu Hattuum leh pulam mite tanpha pahtat thei mi ahidiing ahi.

I Timothy 3:7 - 13 UPA DINMUN LEH ANASEP

“Upa” chi khu Deacon, chi thumal apan a pawt ahia, tuamabang in “Pastor” chi zong Bishop, chi thumal apat a lah ahi. hilchetna tuomtuom ah tambang a mu ahi:

“Bishop” ichi chieng in, overseer, ahisihleh Superintendent, china ahia, enkaitu, endihitu, china in akila hi, adinmun leh ahinapen, Presbytery/Elder, chite toh dinmun kibang a tuot ahi.

“Deacon” chipen khut nasep a Hattuumte nna sem a, lamkai a pangte ahi uhi. Nasemtu (sila) genna a kimang thumal khu ahi. Deacon chi thumal mu masahnepen Nasepte Bung 6 na a mu ahi.

Hattuum khu genthei-liengvaite, panpitu diing a lamkai leh vaihawmtu pen ahiman in, Hattuum lamkai dangte mabang a tammi nasem diing a umdan, gamtat leh khoheidan a, chitna poimaw tuom khat ah “Chitahna leh gin-umna” ahi. Ei Bible ah Bishop Hattuum lamkaitu a kichia, Deacon pen Hattuum Upa chi’n akilehkhie hi. Hattuum a lamkaitu leh Upate in anasep diing uh “Hattuum sung a mimal leh innkuon zousie a diing a, akul-le-poimawte uh suikhie a, tuamite sep tangtunpieh diing” khu ahi. Mite nna seppiehtu ahi ua, tuami nna khu asepa tam pouleh “Deacon” Upa ahina achia deudeu a, asepa tawm deudeu leh “Deacon” Upa ahina adau deudeu hi. Mimal tung leh sungkuon (Innkuon)-te tung a kul-le-poimawte asepa diing dan a, asepa chieng in Pasian in asepa diing a, apiehte semkha

asuoh bep hi. Tuabang a Deacon/U pate in Hattuum mamaw ase
chieng un, tuami Hattuum sung ah kipahna leh thanopna in adim hi.

Amabou, Biehinn sung leh khomipite, vaihawmna nuoi a
“Deacon” upa higiap a, thuncitah bang a kingaituo a, Hattuumte
dinmun vakan ngailou a, Hattuumte inn vatuon ngailou leh thu vagen
ngailou Upate, Pasian in apieh asepdingte semkhalou ahi uhi.
Nasemtupen *SILA* (suoh) ahia, mimal leh sungkuon a tahsapna neite
atahsap bangbang uh ngai poimaw pieh a, haguam a zong ngai
poimaw pieh leh semkhe diing a gingtute nasemtu khu Upate ahi uhi.

A chitna diingte :-

Mi thudih ahidiing ahi: Ahina leh a dinmun toh kituoh a
umthei mi ahidiing ahi. Ahina leh a dinmun jatathuoi ahilam athei gige
a, anasep zong Hattuum pumpi thataang a nasem ahidan amanghillou
diing ahi. Anasep bangtobang in ngiem in um nanleh Khristiante thugin
zong selguh in ana um a, tu in Hagau Siengthou apat in pulah in ahing
umta, tuami thuguh kiselgu khu Pasian in ahing pulah jieh a, tu hun a
kitheikhe thei ahibou hi. Tampen thuguh khat kisel den diingte bang
ahisih hi. Tuamabang in asie-le-pha theina asieng leh asienglou, ahoi
leh ahoilou a um bang in, huoiham leh du-aam napi a, asie-le-pha
theina in siemlou atanthei sihle asie-le-pha theina chiimlou, sienglou
china ahi. Dihloutah a mi kamtam a, zuhai mi leh huoiham mi in Pasian
thuguh akemching thei ngaisih diing hi.

Timothi kung a laithotte ah Paul in sie-le-pha theina chiim
(siengthou) a gen mun mama a, tuachi’n tam khantanhoi michin adia
puonkhiet hinanleh agingta mi maibou in atheitel thei giap a, tuajieh
in “Thuguh” ichi thei hi. Tam ginna thuguh khu Jesu Khrist a um
hundam theina khu ahi. Tam hundamna mu leh tangte in asie-le-pha

theina lungtang sung uah asiengthou hundamna neitu leh kemtu ahidan akithe i zing uhi. Tuajieh in, sie-le-pha theina lungsim leh ngaituona chiimtah a neithe i zing uhi.

Tang 10 ah :

Et patep in um va un : Hattuum Upa diing khu kin-leh-buong a sekhol leh tel ahilou diing ahi. Apientha zou nua hinkhuo a etpatep diing ahi. Tuabang a et a patepna nei zou ahichieng a Hattuum adiing a mi phatuom diingte bou Upa a tel diing ahi. Etdan dihiloutah a, kimai-etna hieng-leh-san thu, be-le-phung thute a etnapen Upa telna a ngaituo votlou diing ahi. Tuabang et-patepna nei a, Upa tel a, a umleh Hattuum mama in athuoh ngei diing ahi. Hattuum Upa et-patep a na um ahidan Nasepte 6:3 ah muthei ahi. Tuabang et-patepna a gensiet bei mi ahichieng a Upa hidiing a chitna nei mi ahi uhi. Hattuum Upa khu gensiet a um diing Bible in achi sih a, Hattuum Upa diing khu gensiet bei mi ahidiing achizaw hi.

Tang 11 ah :

“A jite uh zong nundan hoitah, mi gensiet chinglou, mikitup leh bangkim a mi lungsim siengthou ahidiing uh ahi” Hattuum Upa leh lamkai a pang diing mite a jite uh tambang ahidiing achi hi.

Hattuum Upate nasep ahileh, zingkal nitah leh hunteng a innvena, tasamte panpina, baptisma tangte panpitu leh ahunte uh Laisiengthou simna, sakhuo lam a, ahun tamzaw mang phielphiel ahiman un, ajite uh Nu chingkamtah ahi akul hi. Tuabang ahisihleh Upa in ascp diing lawm sepna ah aji in subuoi in panpi theilou diing hi. Upa khat in anei diing bang a, aji in zong chitna anei diing a poimaw hi.

Upa Hattuum a manphatah leh Upa hoi, Upa deihuoitah ahina diing in Upa ji in chitna kigente anei ngei akul hi. Tam chitna kigente Upate ji mai hilou a, piengtha Khristian numeite zousie in anei ngei ua, ahinkhuo ua um diing khu ahi.

Tambang, chitna nei numeite a jatat huoi numei ahing hi ua, chitahna nei leh numei chitah ahitah jieh un, midangte genselou, innvengte hatlouna a mute gen phutphutlou mi ahidiing hi. "DIABOL" umjie ahileh "MI SUHSIET SAWM A GENSIESIE" china ahi. Numei chingkam a piengtha a, Pasian ta hina nei a Diabol umdan jui a Diabol nasemtu a pankhah thei ahia, panlou diing ahi. Piengthasa Christian numei atamzaw in tam Diabol umdan, "Mite gensiet" apan a kidehtheilou in Diabol na semkha leng in apua nuom tangpi hi. Amabou, Pasian muong a, piengtha Khristian numei pilvangtah a hun mangte'n tam Diabol thang a, awh hun diing anei sih hi.

KIDEHTHEI MI : Tam kidehtheina michin in apoimaw a, adich in Upate kidehthei mi ahidiing ahi. 3:2 a toh aphut leh anget akibang hi. Bangkim anop ah zong, ahasa ah zong, sie-le-pha theina chiimtah nei a, tua dungjui a khohei a gamtat diing ahi. Kilawp phut leh nopsah phut man a, ahun tan theilou a umpen ahoi vawtlou ahi. Tuabang a um sang a bangkim a, amuonhuoi ahidiing uhi. Kingahna tham ching a, gin-umtah a um a, kidehthei mi ahi ngei diing ahi. Tampen Innsung leh Hattuum sung mai hilou in, munteng, silteng a muonhuoi leh midangte gintat a um mi ahidiing uhi. Tambang a umte in pilvangtah a kidehtheina nei a, sie-le-pha theina chiimte china ahi.

Tang 12 ah :

Zi khat nei : Pasal Hattuum Upa a pangthei diingte genna ahi. 3:2 a Bishop a pang diing a chitna agen toh akibang a, aphut leh anget zong akibang hi. Zi khat nei chipen, meisielou china ahi. Pasal azi-le-tate a diing a gin-umtah a um thei mi ahidiing ahi. Ama zi-le-tate a diing a zong gin-um zoulou pasal Hattuum Upa a diing a muonhuoi zoulou china ahi. A imsung a zi-le-tate a diing a muonhuoina anei mi ahiban ah zi-le-tate thunun a, kern siem mi ahidiing a, a imsung a navahtah a vaihawm a, azi-le-tate'n athulah mi ahidiing hi. Tuabang a umtheiloute in Hattuum ah navahtah a vaihawmdan atheisih diing hi. Hattuum Upa leh lamkai khat hina diing a chitnate a et-patepna umlou a, Hattuum in Upa atel chieng ua, tua hattuum mama in athuoh in abuoilaw jel hi. Hattuum in Upa telna ah thumna toh pilvangtah a nei a kul hi.

KIPAHMAN: Bung 3:13 ah, Paul in Hattuum Upa hidiing mite chitna leh siemna anei diing uh kul-le-poimaw tampi agen zou in, tuabang chitna leh siemna nei a thunuoiluttah a nasemte a diing a kipahman mu diing ahing gen kia hi.

Hattuum Upa in Hattuum a, amawpuohna, anasep, gin-umtah leh muonhuoitah a, asepkhiet chieng in anasep leh adinmun bangchi tuh a musit huoi hinarleh mite ngaisang leh tawisang in a um diing hi. Midangte a diing in ama hina leh dinmun en huoi asa diing uhi; chipen Paul in agen nuompen ahi. Hattuum vaihawmna ah tuabang a Hattuum enkoltu Upate in dinmun poimawna leh mawpuohna poimawtah leh deihuoite aluo ngei diing uhi. Hattuum a, agin-umna un mipite a diing a muonngamna a um a, kingahna diing a, tahsanna leh muonngamna mite'n anei uhi. tuabang mite

muongngamna leh Jesu Khrist a kingah ngamnate jieh in tuabang Upate in muongtah leh hangsantah in zauthawngna beikei in asepi diingte uh asem thei uhi, tuabang a, na semte Upate thugen mite'n atahsang un, amuongngam ua, tuachin aju theita diing uhi. Hattuum Upa tampi Hattuumte in amuongngamlou jieh in athugen uh jui theilou a um thei hi. Tuabang a um hun chieing lamkai leh Upate ki-ettha kul hi.

THUGUH

Timothi 3:14-16

Hattuum kipatna leh kibulphuna khu Pasian ma ahia, Khrist a kibulphu thutah, Khantanhui, enkoltu, kemtu, leh pesawntu ahidan, Hattuum nasemtu in athei a, aphawh zing chieing in anasepna ah tha apie a, atha athousah a, a thanuomsah hi. Tua ahiman in Hattuum a lamkai leh Upa telna ah pilvanna apie hi. Tuachi ahiman in Paul in Timothi kung ah mipi lamkai diing leh Upa diingte dinmun agen zou in laithon hah in atupdante leh Hattuum poimaw dante atha in a zilsah hi. Hattuum vaihawmdan apuohnat bangbang in Hagaulam hinkhuo apoi maw angai diing ahi achi hi. Tuachin Hagaulam hinkhuo kibulphuna tambang in agen hi.

Tang 14 ah Paul in Timothi toh kimaituo a, kimu pai alam-etpen hinanleh, hing zekai khaleh chi inn amasang ah tam kithuhilnate ahil sawn hi. Paul in suohta ngei diing a kilam-etna amu ahijieh in, Rome khuo a Paul nivei suongkul tang hidiing a tuot ahi. Tualeh, Paul in bang diing a Ephesa khuo apawtsan diing a Thuhilna neilou e? Chi ngaituona a um hi. Paul in Ephesa apawtsan diing in Kinawtah (kin-le-buong) a pawt ahimaithei a, Paul in Timothi kung a tam kithuhilna kam a pieh sang a lai agelthaw a, umzing diing adei man a, apieh ahimaithei hi.

Tang 15 ah Paul in asiltupte akiheng zuai thei, zekai a umthei ahidan theigige in tam thuhilna apie hi. Tammi thuhilnate ah, Numei, Pasal, Pastor, leh Hattuum Upate, Hattuum sung, Pasian innkuonpite lah a gamtat diingdante thuhilna anei hi. Paul in Hattuum khu "PASIAN HING HATTUOM" achi hi. Tuami Hattuum khu aneitu Pasian ahidan leh mihingte aneitu ahilou dan athuhil nuompen hi. Pasian hing Hattuum khu Pasian a, ahia, aneitu Pasian ahiman in Pasian deidan a kipui a, vaihawm ngei diing ahi achi hi. Khuom in innteng adoukang a, akipsah a, Inn khu a suongphum in akipsah bang in, Hattuum zong, Khantanhoi thutah, Pasian in amite kung a, aman bei a, apieh khu, kembittu, tudettu diing in Pasian in asepta hi. Tam Khantanhoi khu Jesu Khrist apan a mihingte kung a Pasian ahing kihilna thutah khu ahi. Hattuum Khrist adiing a gin-umtah a umlouna anei chieng in Pasian hing kihilna thutah in athuoh a, tuachin Hattuum ah buoina atung jel hi.

Hattuum Pasian thutah kembittu, tukiptu, leh midangte kung a phuonzahtu hidiing a mawpuohna kingahna khu ahi. Hattuum in thutah puongkhelou hitaleh khovel a mite'n thutah bang achi thei tadiing uoi? Pasian hing Hattuum umsunte a mite khu Pasian thutah a diing a khuom-le-bante ahi uhi. Thutah kingahna umsun khu Hattuum ahia, Hattuum chiloungal ah khovel a mite in thutah ajah ua, amuna diing uh a umsih hi. Hattuum mawpuohna alien a, khovel pumpi huop ahiman in, I liengkou a mawpuohna kinga Pasian thutah puongjah diing a Pasian sekholte ihi ua, gin-um leh, thanuomtah a Pasian nna sem a, Khrist shisan pha a mite'n siemtanna amu a, hundamna atan theina diing un, thutah puong ngam a theipitu dihtah Khrist a diing a hidiing in Pasian nna sem jel va ui.

Tang 16 ah: Khristian sakhuo thuguh khu bangjat a lamdang leh thupi ahitai chi koima'n kithcimawbawl theisih va! Pasion limsah a biehma thuguh khu miteng mu in athupi hi. Thuhun tha ah "Thuguh kichi sil bang ahei khat kiselgu a thei zoulou diing khop a kiselgu leh kichien mangloute bang ahisih hi". Tampen van deitah khat aman diing zau a, mun bitzaw a koiching a um, tuapen ahuntah leh poimaw dungjui a, muthei leh kilang thei jel chieng mama toh kibang ahi. Pasion theina thuguh khu, tambang ahi: Silkhat selguh a um a mu kia thei-te genna ahi. Tuabang a kiselgu Pasion thu in atuppen khu mite in ahinkhuo ua Pasion bie a, limsah diing ahi. Tam thuguh Pasion in apulah a, aphuonlang khu athupi hi. Pasion a hinna thutah nidang a selguh a umpen tua mite a diing a phuonlang a um khu tammi ahi.

"Amapen mihing lim bang in ang kilang a tuachia hagau in theipi in Vansawltahte'n zong amu uhi. Ama khantan namchin kung ah; gen in a um a, Leitung in agingta a, tuachin van ah lahtou in a umta hi".

Laisiengthou in tambang a, agenpen Jesu Khrist ahi chi chiongta a theilaguol (haiguol) ahisih hi. Mihing limbang in ang kilang a chia agenna ah Khrist Pasion khu mihing ahing suohna agen hi. Mihingte tungtang tuabang a gen thei ahisih a, mihing limbang in ang kilang chipen in, amapen, mihing ahisih a, mihingte sang a tungnunna anei hi china ahi. Thu khu sa ahing suoh a, tua khu kumtawn Pasion ana hi a, shithei pumpi/tahsa nei in Pasion khu mihing Jesu Khrist ahing suoh hi. Hagau a siemtansah in a um hi. Thuguol khatna in Khrist mihing tahtah ahina agen a, Thuguol nina in asienthou bukimna agen hi.

Vansawltahnten amu :- Jesu Khrist apien in Angelte'n Lapawl asa ua, sol a, a um sung in Vansawltahte'n ana ahing seppieh

uhi. Galili ah thuhilna anei lai in Vansawltah ahing kihil uh. A lungkham-a mangbat lai in angelte'n a hamuon uhi. A shi lai in a han avengbit ua, tuate in athawkiana thu apuongjah uhi. Van ah a katou a, ahing peikiana diing agenlawh uhi. Mangpa Jesu nasep in lei leh van ahuom suoh sieng a, angel siengthoute'n Mangpa Jesu bie a, ana aseppieh tawntung uh chi genna hipen diing a gintat ahi. "Leitung mite gintat" Leitung mite'n agintat uh, atahsan ua, apom uh, china ahi. Tambang silthupi leh lamdangtah mai mawltah a gen in a um hi. "Jesu a shina leh athawkiana, van a, akatou lai in nuajui 120 maibou ahia, (Nasepte 1:15) tam khantan lah Galili a sing lemsiemtu khat Palestine gam a tangtung khat, khelnate jieh a singlamte a khailia a umpa khantan ahigiap hi. Tambang hinapi in tu kum 2000 tan ah leitung pumpi ah kawlmong tanpha ah dalguollou in a khantan thedal in a umta. Chichin, namchin a mite'n Jesu khu hundamna lampi ahi chi gingta in hundampa in apomta uhi. Mihing hatna leh pilna a sepkhiet thei guollou sepkhiet a um khu tamnah gen in a um hi.

Van ah lahtou in a um:- Jesu Khrist khantan khu van ah akipan a, van ah atawp hi. Sila (suoh) bang in leitung ah ahing um a, mikhiel bang a tha leh khailup in a um a, siatukil a kilna pawnte toh han apan athoukia a, tu in Van Mangtoupaha zietlam ah thupitah in eite adiing a thungen zing (thum zing) in a umta hi. Tambang ahiman in khantanhoi nasemtute umdan leh khohei gamtat ah apilvang ua, ahoitheipen a, a um diing uh ahi. Hagausiengthou pawlna leh puina nuoi ah Hattuom vaihawmna a um chieng in Hattuom achidam a, hoina leh kilawmnapen Hattuom sung leh pulam ah muthei in a um diing hi.

PASTOR MAWPUOHNA

I-Timothi 4:1-16

“Mi pawlkhat in hun nukhia lam chieng in ginna khu taisan in Hagau lepchiète jui in, dawimangpa thuhil khu sang va chi Hagau in kichientah in agen hi”

Paul in Pasion limsahna thuguh aloupidan tomkim in agen a, tuami limsahnapen hun nukhia lam ah mi khenkhatte’n limsahna, ginna a kipan a pielmang diing uh ahi chi chientah a Hagau in agendan Timothi ahil hi. Tam ginna ma khu Pasion limsahna thuguh ahingal a, tuami khu thutah umsun, Jesu Khrist khu ahi. Tam hun nukhia lam chia gen a umpen ahileh Jesu hing peikia masangteng china hilou in, Hagau Siengthou ahing kilah apan a hun um nalaiteng china ahi. Tam “GINNA” taisan a Hagau lepchiète jui chipen akipan zouta zong ahi maithei.

Mathai 24:11 ah Mangpa Jesu’n ana genlawhta a, Nasepte 20:29,30 Paul in ana gen malamta. Sawltah dangte’n zong ana genlawhta uhi. Bang ding a *GINNA* tawpsan thei diing? Laisiengthou in, tam itenna leitung ahing nuom deudeu diing a, ahoi deudeu diing a, galmuongtah leh thovengtah a um deudeu diing chin ahing hilsih a, tuate sang in hun hasa leh nasep hasa hunte ahing tung diing chiin ahing hilna ahagenzaw hi, tuama bang in, hun nukhia lam ah kithuhilna dihloute ahing um diingdan leh mite apuimang diingdan agenazaw hi.

Puimangna Hagau leh Pasion thutah doudalna a kithuhilnate hing um in, tuabang a thuhilna neitu in puimangna Hagau in mite apui mang jel diing hi. Tam puimangna Hagau leh thutah Hagau khu akibang a ngaituona um van, Pasion thutah hagau toh buhtuo a um puimangna Hagau khu “Vanmun lah a Hagau gilou hon umte chimaw a hun nukhia lam a mi bangza ahei beh puimang teitei asawm diing

ua, Jesu gingta a Khristiante nasan puimang asawm diing uhi. Tam puimangna Hagaupen dawí apan a pieng ahia, tuabang thuhiltute zuougen leh lungsim chiimloutah a lametna dihloutah nei a thugente ahi uhi. Thuhilna dihlou chi umjiepen athuhiltu hizawlou in athuhilpen china ahi. Paul in tam laihah sung ah thuhilna dihlou chi leh thuhilna dihlou chi a tekah zing hi. Tuachin hun nukhia lam ah gindan dihlou, thuhilna dihlou leh thuhiltu dihloute ahing um diing chia agente Ephessa khuo ah ana um zouta hi.

Tuami hunlai a huikhuo a umna, gamtang Hagau gilou hon umte, mihingte soisa leh gelgawt a sunatu diing a umdan a gintatna ana um ahi. Tuabang a um dawí apan a Hagau gilou hingpei in kithuhilna dihloute mihingte a hing um in, tuabang mite in thuhilna aneite un mite athuzaw pawl a um diing achi hi. Tambang thute khovel a mipil leh mi siemte gen hizawlou in "Pasian Hagau Siengthou in kichientah a, agen ahi" Tua ahijieh in, cite pom leh pomlou thu in akinga sih hi.

GINNA TAISANTE :- "Ginna taisante" chi umjie ahileh ginna zieh a siemtangsa, a hepina zieh a hundamna tangsate, hundamna amangthei china hizawlou in ginna khu lawptawp jieh mai a thutah leh tahlou enchien theilou a ginna taisante, tawpsan thei mite ginna khu Khrist ah kibal khalou, zungkaina neilou a pulam etdan a Khristian piengtha toh kibahna nei mite china ahi. Pastor leh Upa in hattuum chidamtah a umna diing a mawpuohma Pasian in apieh ahia, pilvangtah a Hattuum enkol a, kithuhilna dihlou leh dihloute enjui detdet a hattuumte poimawna asepkhiet diing uh Pastor leh Upate mawpuoh ahi.

Bung 5:17 "Lamkai Upate silhoi bawl a, adieh in thugen leh mihil nasep lam a kukalte khu nuomman a zani a ngaituo diing ahi hi"

"Lamkai silhoi bawl" achi khu Hattuum Upa Hattuum hoina diing mai ngaituo a, ama mimal, deina leh punna diing ngaituo

vawtloute genna ahi. Lamkai silhoi bawl chi in vaihawmna zong ahuomtel a, tuami vaihawmna apan a Hattuum kep leh etkol ahi. Vaihawmna apei dihlou chieng in na a kitem dihlou china ahia, Hattuum a diing a silhoi bawl ahitheisih hi. Vaihawmna dih (silhoi bawl) chipen, Committee, khawmpi vaihawmnate, ngai poimaw a, lungluttah leh chitahna toh vatel gige-te china ahi. Tuabang mite aleni a siem thupi diing ahi uhi. Tuabang mite jatatna toh a gin-umna uleh akukalnate uh kipahman asum a zong piehthei ahidan genna ahi. Nasep leh thu a semgimte ahi uh chi zong agenna ahi. Tuat khu Hattuum lamkai, Pastor, Upate ma genna ahikia hi. Silhoi nasepna leh ahoi diing deina a vaihawmtu ahiban uah, mipite kung a thugen leh Pasian thutah gen a kizang sawnsawnte ahi ua, amaute pahtawi tuoh ahi uhi.

Tang 18 ah, Tuabang nasem hoi Upate leh Pastorte pahtawi a, siemthupi leh akhosahna uh siem hoisah diing Hattuumte mawpuohna ahi. Hattuumte Hagau lam a makai a, puitute'n tahsa a zong hamphatna atan diing uh genna in, thuhunlui Bible tang ahing tahlang hi. Deuteronomy 25:4na "Bawngtal in bu achil lai in akam kan sin" chileh Mangpa Jesu kam a thupot "Nasemtuh khu anetah ahi" chi ahi, tammi in agennop ahileh Hattuum lamkai Pastor leh Upate nasemhoite jatatna pieh diing ahi china ahi. Dangka tanpha Hattuum lemsahna toh piehthei ahi chi gennuom ahi.

Hattuum nasemtute law hoitah a pieh diing ahidan Pasian apan a thupot Timothy in theileh chi Paul deidan ahi. Sumpiehna ah chiltat vetvawt a sum pawng ngainat khu Paul in adeisih hi. Pasian in bu chiltu bawngte nangawn akiching am pieh diing ahileh Hattuumte in zong Mangpa nasemtute akiching law pieh diing china ahi.

HATTUOM BUOINA

Tita 3:10,11

“Kikhenna piengsahpapa nivei galgih unlen, Tua zou chieing in kikuppi tamalmal sih un, tuabang mi khu kisie ahi chi nathei a, zong adihloudan akithei khe mai hi” Hattuom a buoina bawl a, pawldang a lut sawm ahiei, pawl dang sat tum mi a umleh nivei tan taihilna nei diing ahidan hil ihia, tuami manglou a pautat teiteite kikuppi nawnsin chi ahi. Tambang a ginna tuom nei mi sap-ham in “separatist” Factions, Divisive persons” chibang in akigiel hi. Tuapen kikhenna piengsahtu china ahi. Gindan, pomdan dihloute china zong ahi. Thuhiltu dihloute apan a tambang kikhennate pieng thei ahi. Kithuhilna dihloute jie a Hattuom a buoina leh kikhenna tanpha tungthei ahina ah, Paul lungsim leh ngaituona asunuom theisih hi. Tuajieh a tuabang tungsah mi nivei taihil a, taihilna leh vauna nei zou a, kisia theiloute thudon nawnlou a kikuppi nawnlou diing ahi achi hi.

Rome 16:17 ah “Thuhilna na zilsate utoh kituohlou (kikal) thuhilnate, kikhenna leh puana tungsahute toh kisaina nei sih un chin Paul in thuhilna anei hi. Gindan, pomdan dihlou mite kam hat (selkha) a pang in mi toh kisel ahat uhi. Mi soisel leh mi gensiet ahat ua, tuabang mite in kikhenna atungsah nuom uhi. Tuachibang mite nivei tan bang taihil a vauna pediing a thuhil diingte ihi uhi.

Mi toh kilem diing a thuhilna nei diing ichi ua, hinanleh, laisengthou in ahing hilna ah, atawp tan tung kei a kikuppi nawnlou hun diing a um hi achi hi. Lungsim leh ngaituona siengthoutah nei a, Pasian thu za nuom a dangtah mi tampi a um hi chi theizing a, tuabang mite kung a khantanhoi thu gen a nasem diing in Pasian in ahing dei hi. Tuabang ahilai a lungsim leh ngaituona setan bum a um a, lungtang khaute vasusu lou diing in laisengthou in ang hil hi. Hattuom a tambang kikhenna piengsahte in koima ngaidan lalou a, ama ngaituona mai

toh lungtang khawhvawt nei a pei vingvengte ahi uhi. Tuabang umdan tang 9 (kuo) ah akimu hi. Tuabang mite nivei tan Tita in thu apieh diing a thuhil ahi.

Tang 11 ah, "Tuabang mi khu kisie ahi chi na thei a, zong adihlou dan akithei khe mai hi"

'Hichibang mite akisie ahi chi nathei a' achia, kisie chi umjie ahileh ahidiing bang a umlou, adihlou a um, leh gilou pumlum chilei adih kim maithei, alungsim leh ngaituona kise gawp, kawp gawp ahiman in thuhilna a kingaituo thei a hoi kia diing a lam-et huoi nawnlou khop a **GILOU** china ahi. Tuabang gamtatna khu Pasian leemguot leh tupte toh kituohlou (kikal) a gamtatna ahi. Mi toh kisel hat a, pawluom satna neitute amau leh amau kimelma ahi uhi. Tuabang mi khatvei, nivei taihil zong phattuomna a umlouleh lungsim ngaituona kise gawp ahi akilang hi. Tambang mi toh kiselsel aphattuomna um keilou ahi. Amaute hinkhuo a kisuhbuoi a mawpai zong akul nawnlou ahi. Ama leh ama a kimawpai zouta ngal a, ama a kisiemtangsah diing a, hinanleh, ama leh ama a umdan in siemmaw atan zouta.

Tambang mite tung a dawzouna, leh thuohzouna, itna akiching itahlat diing ahi. Hattuom sih-le-tang a Hattuom lamkaite in khatvei, nivei itna leh deisahna toh a taihil zou a zong kisiana neilou a, anasep hoiloute atawpsan louleh, Hattuom in a itna leh a taihilnate uh a belap diing ua, tua zong aphattuom louleh, hattuom pulam a koi diing ahi. Tambang a thupuana tawpkhawh zong itna leh siemphat utna jie ahidiing ahi. Tuabang nasep in atup ahileh Hattuom hoina diing ahi. Tuachia, Pasian thupina diing a Hattuom hoina diing isui gige ahi chi mangngil lou diing ahi. Hattuom thununna in atup khu tam tundingthana ahi.

BUOINA CHINI

1. **Zukham buoite :** Zukham leh damdawi kham a buoina leitung ah apung deudeu diing abang hi. Zudawntepen azu dugaw tentun a, tui sa leh du ngetngut a dawn a umsih hi. Zudawn mite achil in dumawng a dawn hilou in kiphatsah man in adawn masa ua, zu adawn chil un thazawtah in adawn ua, hinanleh ahing dawndawn chieng un, azu in adawntu ahing thunun hi. A thunun chillai in, mite mu leh thei diing zumhuoi asa ua, aguh in abawl cheuh cheuh uhi. Tambang in zudawnte du jieh hilou in kiphatsah man in zudawn akipan uhi. Ahing sawt hiei hiei a, zumna a zong ngai nawnlou in buoijahna ahing umta hi.

Tambang zungolveite kepna ah nasatah a mawpai diing ahisih a, ama zong siemlou kitan ahidan theisiem apoimaw hi. Jesu'n belam mang thu gentena a, agen bang a 99-te nuasie a, amaute siemtha kia poimaw ahidan thei zing diing ahi. Tuabang mite tung ah inn sesa lamkia leh puon sesa siemhoi kia tobang a kingaituo diing a itna leh thuohzouna toh pawl a buoipi ngaite ahi uhi. Zukham ahoiloudante apan a tunding isawm diing ahi.

Zukham hoilou dante : Zukham a um in mi ahina dihtah a sumang hi, alungsim leh ngaituona angai toh akibang nawnsih hi. Poimawna bei kei a, cima mimal gongsanna jieh a sum tampi suhbcina ahi. Atangpi in zukhamna in mite ah hangsanna apic a, phunna leh lungthah lunghamna apie hi. Gilpi a tahsa hienge sin, tuop leh gilpi in athuoh sih a, tuate asusie in natna leh shina atun thei hi. Tuabang ma in damdawi zong abawlte satung ah natna atun a, shina atun hi. Tamte pen bawl diing a Hattuom dan in akhamte ahia, innsung leh dinmun a diing a ngiemna leh midangte adia musit huai dinmun atun hi.

2. **InnKuon Sung Buoina** : Innkuon sung buoinate apiengjel a, tuate neizoulou jiehte bang, zawn-le-ngau jiehte bang ahi nuom a, tuami buoinate apienna bulpi ahileh Nu leh pa, Innsung mite kikupna houlimna tahsapna jiehe leh mimal lungsim leh ngaituona mai a sil zousie peipina ahi nuom hi. Tualeh, Nupa kal a hatna kibahlou jiehte a thuohhatna tahsap jiehe ahinuom a, mimal in sil khat pou pou aguh a gen leh bawl chiinte jiehe zong ahinuom hi. Tuabang innsung kituohloute, adihlouna uleh achitlounate jiehe ua, mawpai a huotna leh musitna neilou a itna toh lawm bawl zawh diing ahi. Tuabang innsung a "Innsung nuom khu vangam naipen ahi" chia, innsung ki-it a, kithutuohte in nuom asah dante uh genpi diing ahi. Innsung nuomtah mai a zong numeite va mouta a, tuami innsung a innsung mi hina avatan chieng zong innsung nuomlai zong anuomlou innsung ahinuom tangpi hi. Numeite'n mi tapa zi a, a um chieng ua, a innpipa/innpinu kung a, achi diing lawm "Gang, Ni, Nu, Pa" achi ngamlouna, chi utlounate zong innsung sietnate lah a khat ahi. I chidiing lawm, a mi ichileh mite lungdamna apie hi chi thei a, innsung nuom diing idei chiet a, hinanleh "A man pezouloute innsung anuom theisih a, a man pezoute innsung khu innsung nuom asuoh hi. (aman pe zou leh pezoulou chipen innsung nopna diing a um zou leh um zoulou china ahi).

Innsung nuom hina diing in, eima deidan leh eima ngaidan mai a peilou a, Pasian maitam siem a, kithuhil a, kikup tam apoimaw a, Pasian ah thum zing a Khristian innkuon nuom siem diing khu lamkai detdoute leh Upate mai hilou a Khristian zousie in a mawpuoh leh Pasian deidan ahi gige hi. Tuajieh in kikum khawm a, Pasian phat khawm a, innsung nuom siem khu Pasian dcina pichinna ahi.

VANTAANG THUMANNA

Rome 13:1-6

“Koipou in Kumpi thuneina aman diing ahi; ajiehpen Pasion phalna lou in thuneina kichi a um theisih a, thuneite khu Pasion tunding zong ahi uhi” Gingtute khovel siemhoi diing a lam-ette ahi: tuajieh in gingtute in khovel Kumpite thuneina leh vaihawmnate a thumangte ahidiing uhi. I Timothy 2: 1,2 ah tuami vaihawmna apan a Pasion in amite a kep leh aven ahiman in vaihawmte a diing a thumsah diing ahi achi hi. Tita 3:1 ah zong vaihawmte thu man diing ahidan agen kia hi. Tuajieh in Khristiante a diing in gamsung kivaipuohna vaihawmte thu mang a khuo-le-tui hoi hidiing khu Khristian zousie mawpuoh ahi.

Bangjieh a man diing? Pasion thu lou in koima vaihawmna touna ah atouthei sih a, tuami vaihawm mite khu Pasion sekhol ahi uhi. Tuajieh in koipou in vaihawmmite thu aman lou a, aselleh Pasion sekhol selkal ahi uhi chi ahi. Pasion in mihingte a etkolna diing in vaihawmna asiem a, tuami vaihawmna tungtawn in mihingte a enkol hi. Khristian hiseselou zong mi zousie hindan kilawm leh mumal neitah a, ahin diing Pasion in adei hi. Tuajieh in Pasion in “Vaihawmtu selkalte in ama uh tung ah vaihawmna amu diing uh” achi hi. Thumanglou mi in thumanlouna jieh a vaihawmna atung uah a um ding a, vaihawmmite khut ah thumanlouna zieh a **GAWTNA** khu Pasion lemsahpi ahidan theizing diing ahi. Peter in zong “Mangpa Jesu jiehma in mihing dante nuoi ah kitulut un” ana chi hi. (I Peter 2:13) Khoveldan leh vaihawmnate Khristiante bawl ahisih a, hinanleh tuami vaihawmte thu man diing khu Khristiante um diingdan ahi chi akimu a, thumanlouna jieh a Jesu minsietsah diing khu a zauhuoi ahi.

Vaihawmmite khu nahoi sem ahi ua, Pasian nna semtu ahi uh, tuami nahoipen khuo leh tui hoina diing ahia, Khristiante hoina diing a nasemtu ahi uhi. Tam silhoi sepna in ahoiloute gawtna leh tunding thana nasep ahia, nahoi sem a, khuo-le-tui hoite a diing in vaihawmtu ginna diing a umsih achi hi. Khristiante khu nahoi sem diing a lamette ahia, nahoi sem a thumang a hutdamtate ahi uhi. Tuabang ihilai un silhoilou bawlte diing in vaihawmte gin huoi mawng ahi. Vaihawmmite'n temsau (gawtna) lah amawhtawi ngal loudiing jieh un, tuami vaihawmtute Pasian nasem a, sil bawlkhielte tung a lungthahna phuba lami ahi uhi achi hi. Mi a damlai a, anasep bang jel a vaihawmsah diing in Pasian in leitung ah vaihawmna leh vaihawmtu akoi hi chi Israelte tungtang ah kichientah in imuthei hi. Israelte'n silhoilou abawlchieng un namdangte khut ah Pasian gawtna amu paipai uh chi kimu hi. Pasian in Nebukadnezar bang zong Pasian awilou mi ahi. "Ka sila" ka nasemtu achi hi. Tuajieh in vaihawmte khu nasemhoiloute tung a phulatu diing a Pasian koi ahi uhi.

Tuaban ah, thumannapen gawt a um diing zauna mai hilou a, adih leh ahoi ahijieh a, thumangtu leh nahoi semtu hidiing ahizaw hi. Na sie-le-pha theina jieh a, vaihawmtute thu thu a na um diing ahizaw hi. Tuami thumanna ah Pasian dan kal vaihawmna a umthei tham a, tuabang umna mun ah vaihawmtu in amaw apaw diing a, communist gamte ah mimal leh zalenna hoina diing sang a mi zousie vaihawmna pumpi (State) hoina diing ngaituona mun ah Khristian sie-leh pha theina toh kituohlou mulkimhuoi tampi a umthei hi. Tuachibang um diing zauna mun ah Khristiante in, a umlouna diing a nasatah a panlahna apoimaw mama hi. Tuabang liengte pen Pasian lemsahna lou in atung theisih diing hi.

Tuajieh in sie (khasana) na pieh uh, zau jieh mai hilou a, adihna jieh a sie-le-pha theina chiimtah toh sie napieh uh ahi achina ahia, pieh diing tuomtuomte leiman sunna diing ah leiman sung unlen, sic lieuna diing ah sie pie unlen gin diingte giing unlen, jatat diingpa zong jatatna pie un achi hi. Tambang a gen hun in Paul in Judate'n Rome solkal a sie apiehte uh athci ahingei diing tuabang pieh diingte a phunlou kei a pieh ahoi hi china ahi. Solkal sie, leiman, vantung leiman, pieh diingte apieh ngei uh poimaw ahi chi Jesu'n zong "Kaisar silte Kaisar kung ah pie unlen, Pasian silte Pasian kung ah pie un" achi hi (Mathai 22:21) Vaihawmna a pieh diing a poimawte pieh a, sil leh bangkim zong pieh diing; Pasian silte zong Pasian pieh diing. Pasian Hagaulam a kul leh poimawte zong bawl diing; tualeh khovel vaihawmna thu man khu Pasian nasepna leh Pasian thumanna ahia, solkal vankhamte ah zong kivenbit diing ahi. Jatat diingte jatat siem leh pahtawi diingte pahtawi siem khu Khristiante nasep diing ahi. Tuajieh in, **MUTHEI THUNEITE THU MANNA IN, MUTHEILOU PASIAN THU MANDAN I KIZIL UA, MUTHEILOU PASIAN THU IMANNA UN VAIHAWMTE THU IMANSIEMNA DIING UH AHI.**

UPA KITEL DAN

“Tuajieh in unaute aw, nalah uah Hagausiengthou a dim leh pilna nei a kithei pasal sagi telkhie unlen, tam silte tung ah mawpuohna ipe diing uhi” (Nas. 6:3).

Hattuom sung a, ngaituo diingte, sep-le-bawl diingte, hoitah a ngaituo a, sepkhiet leh bawlkhiat a, a umna diing in, tuate a mawpuo diing Hattuomte in Hattuom leh pawlpi dan bang jel a, atel jel diing uh ahi chi kichientah a mu ahi. Tam kitelna a tel diing leh tellou diingte Hattuom dan bang jel a chitna neite ahidiing a chitna aneite lah ah zong tam “Hagau siengthou a dim leh pilna nei a kithei mite ahidiing” chi Lai siengthou in ang hil hi. Hattuom a lamkai Pastor, Upa telna a tena dihtah manglou a kitelna a um chieng in, Pasian thutah in athuoh kha a, tuami thutah thuohna in Hattuom asukha hi. Leitung kitelna bang a ngaisutna umlou keei a kitelnapen Hattuom neitu Pasian ahia, ancitu Pasian deidan a tel ahingei diing ahi.

Hattuom khat a danzoukim bangza a um chieng a Upa bang za um diing chipen peipi thei dan mumal umsih nanleh, danzoukim 15 jel thatang a palai khat Synod a palai apeithe i a tuabang a danzoukim 15 zel in Upa khat apoimaw chin ana kituot hi. Tu-le-tu a P.C.I. Danbu siemthana ah Synod mi tam umlounate in Synod palai diing dan zoukim 50 tang in palai khat jel asawl thei hi. Tuabang ngaisutna dan hitaleh danzoukim 50 umna ah Upa khat apoimaw china ahi. Tambang a tuotna ah Hattuom khat ah Upa khat apoimaw a, tuaban ah Hattuom in Upa angetbe nuom chieng danzoukim 50 jel a tuot Upa khat ngetthei china ahi.

Hattuom lamkai, Pastor, Upa siemna a mawpuohna Hattuom ah akinga hi. Tambang a Pasian sila (suoh) hi a, Hattuomte nasem diing khu siemkhiet ahichiang in a mawpotu Hattuom mite apilvan kul hi.

UPA KITELNA

1. Hattuom khat in Upa apoimaw chieng L.C.C. in genkhawmna anei diing a, L.C.C. tamzaw in nget diing a thukimna aneileh District khawmpi ah ngetna bawl van, tuami ngetna ah L.C.C. thupassed leh L.C.C. seal um ngei in ngetna pieh ahidiing hi. District khawmpi in nguntah a genkhawm in tua ngetna alemahpileh Presbytery khawmpi ah atut diing hi. Tuachin Presbytery khawmpi in thutawp abawl diing hi.
2. Hattuomte'n Upa ngetna khu akumteng a khawllou a, a ngetthei ahisih diing a, telching kum ahi in zong telchinglou ahi in zong kum kizom a Hattuom in Upa ngetna bawllou diing ahi. Khatvei thu a khat sang a tamzaw Upa ngetna zong bawllou diing ahi.
3. Presbytery khawmpi in Upa tel diing guotna anei diing a, guot a umte'n atelna diing hun hapta khat tei hillawhna abawlngei diing uh ahi. Upa tel diingte'n tam Upa chitna leh teldan bu leh P.C.I. Dan bu toh kituoh in kitelna a sai jel diing uhi.
4. Upa telna hun ah Hattuom a dan zoukim akimkhat vote khe diing a, a umlouleh Upa telna pen nei theilou ahidiing. Tualch, Upa tel diing a kuonte'n vote aneitheisih diing.

5. Upa Candidate guotna ah L.C.C. member lah ah sawm a khat atawmpen a kum thum kizom a pethei mite lah a pan Candidate guon ahidiing. Tuabang a L.C.C. in candidate aguoltuoh zou chieng in koima mimal ngaidan a ki-awngsut thei ahisih diing. Tualeh, Candidate thum sang a tawmzaw ahitheisih diing hi.
6. Kitelna ah (Secret Ballot Paper) koima mupilou laipoun a gelthaw a kitelna nei ahidiing hi. Tuami laipounpen Hattuom seal nam a chiente ahidiing hi. Khat-le-khat kihoukhawmna, kidohtuo chite L.C.C. in khamna bawl ngeingei diing ahi.
7. Kitelna hoitah a bawlthei ahina diing in Upa tel diing a kuonte leh L.C.C. in angaituo khawm masah diing ahi. Tuami kitelna thu Presbytery Standing Committee a tut ahidiing a, Presbytery in thutawp abawl diing hi.
8. Upa telna a telching a umte in (ordination) namdetna diing in laivuonna (Exam) abawl ngei diing uhi. Subject-te (laibu sim diingte):- 1) Khantanhoi bu lite 2) Thuginpi Sawmte 3) Sacrament tungtang 4) Hattuom thununnate, tamte Upa telching a umte Presbytery in theisahna abawl diing hi.
9. Upa laivuonna (Exam) a lawching leh lawsamte tungtang Presbytery Last Standing Committee in agenkhawm man ngei diing ahi. Upa examna a lawsapna nei a umleh tuamite examna abawlthei kia diing leh abawlthei nawnlou diing thu Presbytery khawmpi in thutawp abawl diing hi.
10. Hattuom sung a nopni-daani a um chieng in L.C.C. vaiguonna khat pou pou ah bieltu Pastor leh Upate in puitu hina aladiing hi. Biel Pastor leh Upate umlouna hun ah L.C.C. in mawpuohna aladiing hi.

11. Koitobang Upa telching ahichieng (ordination) namdet ahi masang elect Upa a kichi thei a, Presbytery khawmpi in namdetna abawl zou chieng Upa akichi hi. Upate toh Hattuum khat a semkhawnte L.C.C. member akichi hi. Local Upa chi Presbytery Dan ah a umsih a, zahlou diing ahi.

VAIGUON

1. Tunkimnitah in thugenna ah Lamkai chitna leh Upa teldan bu a Upa chitnate gen ahidiing.
2. A tel nii in Biehinn kaina ah, Pasion thutah genna leh thumguolna nei a kitelna nei ahidiing.
3. A tawp zan ah, Upa telching hi in telchinglou hitaleh Hattuumte hantawwna thu gen diing.

KITELNA PUONKHIETNA :

Pilvangtah a, amudan uh siem a, atel mi phaza sethum suo seni mu a umleh tuabang a mu mi khu Upa hidiing a teldoh a puonkhiet diing. Tuabang zousie a Hattuum laibu ua gellut diing. A vote mudan zousie uh alomlom a kepbit a, L.C.C. Chairman/Secretaryte khut a piekhiet diing. Telching ahileh achingpen puonna nei diing, telchinglou ahileh "Telching zoulou" ahidan puon diing a mimal mudan puonlou ahoi zaw hi.

